


傷寒雜病論集解

八九



傷寒雜病論集解卷第八

日本

醫師法眼細矢東安惟貞著

辨太陰病脉證并治

按素問陰陽離合論曰中身而上名曰廣明廣明
 之下名曰太陰夫太陰者陰之表也一身之中除
 肌膚太陽胸脇少陽腸胃陽明則陰之表者大腹
 是也大腹者胸膈之下腸胃之外乃為陰分之表
 故曰太陰也風冷直乘於腹胃陽斯損脾之轉輸
 乃敗腹痛吐瀉之疾隨起或脹或滿或澹者謂之

太陰病也。太陰者土氣也。通於長夏。氣是以其病。夏秋間最居多。其人苦暄暑。數浴於湯。盤甚者。浴於河水。寐則恣脫衣被。或逐冷眠臥。或久坐於涼臺。陽氣爲之所折。虛寒從內生。於是脾失轉輸之職。腹痛吐瀉隨起。是所謂太陰病也。或飲食過飽。生冷瓜果傷其內。而腹痛吐瀉者。亦同致也。夏月寐臥。脫衣被而感風冷。手足煩疼。兼腹痛若下利者。俗謂之寢冷病。此亦屬太陰病也。又俗曰時氣。亦是屬太陰病之輕者。皆當行溫散法。輕者與桂枝之類。重者四逆理中輩也。

太陰之爲病。腹滿而吐。食不下。自利益甚。時腹自痛。若下之。必胸下結鞕。

太陰本是天之三陰。三陽六氣中之一。卽謂長夏氣。此時濕土用事。物化充成。以其土之廣厚。謂之太陰也。在人體則大腹爲大陰位也。月令曰。季夏之月。土潤溽暑。大雨時行。是故邪氣直乘於腹。而發熱下利。或腹痛吐瀉。凡病作季夏之象者。皆謂之太陰病也。夫太陰之爲病。之太陰指腹而言。自此以下。凡曰太陰病者。以邪在腹者言也。卽風冷乘於腹。其病關脾者是也。蓋太陰病與少陰病大

畧彷彿但有標本微甚之殊耳其損元陽者爲少
陰病元陽無事者爲太陰病究竟從外所傷者爲
太陰病從內受傷者爲少陰病也夫風冷直客於
腹則脾氣不行故腹滿而吐食不下於咽也脾氣
不行則水穀不分是以自利益甚自利甚則胃中
虛而寒益留於內故時腹自痛五十七難曰脾泄
者腹脹滿泄注食即嘔吐逆是也若誤認實滿以
下之胃中益虛陽氣愈不布陽不布則陰不化故
胸下結鞭也要畧曰瘦人繞臍痛必有風冷穀氣
不行而反下之其氣必衝不衝者心下則痞也太

陽篇曰病發於陰而反下之因作痞也此曰結鞭
乃痞鞭之謂

○太陰中風四肢煩疼陽微陰濇而長者爲欲愈

風冷乘於腹而發熱下利若腹痛者謂之太陰中
風夏時寢冷病是也四肢煩疼者熱發於手足此
寒變熱走於陽分乃佳兆也陽微即浮微是邪不
暴之診陰濇即沉濇蓋下利者其停滯者與津液
俱併去故暫現濇脈穀氣未盛故也然帶長脈則
有日長之勢何恐濇脈之亡血胃陽充則濇脈自
去故爲欲愈也欲者欲而未遂之辭乃爲愈之漸

也。

○太陰病欲解時從亥至丑上

下利病夜陰不行者為欲愈所謂自得其位而起也。蓋雖曰太陰從亥至丑上少陰從子至寅上厥陰從丑至卯上然以三陽之餘數言之則太陰王於亥少陰王於子厥陰王於丑各得王時欲解也。夫太陰者陰之初少陰者陰之中厥陰者陰之終然則三陰各一時總是陰時也由是觀之三陰之病大畧彷彿但因其輕重而有差別耳。○再按季夏之月土氣盛于外必衰于內故夏月專作裏病

也。其至亥上則土氣藏於內是故其病欲解少於此時也。

○太陰病脉浮者可發汗宜桂枝湯

風冷乘於腹者謂之太陰病乃夏月寢冷病之類此雖有腹痛下利而其脉浮者邪欲出於外也故為可發汗桂枝湯即溫散之法也。

桂枝湯方

桂枝 三兩 芍藥 三兩 甘草 二兩 生薑 三兩

大棗 十二枚

右五味以水七升煮取三升去滓溫服一升須臾飲

熱稀粥一升以助藥力温覆取汗

○自利不渴者屬太陰以其藏有寒故也當温之宜服四逆輩

自利非謂不覺而利但自然而利猶言善下利也少陰篇曰自利而渴者屬少陰也虛故引水自救蓋自利而渴者腹中水穀盡下去也故引水自救自利不渴者此雖下利而濕不去但因腹中留寒而胃陽不振脾氣不轉故曰屬太陰也其藏指腹裏而言也腹中有寒故四逆輩温之四逆輩即四逆理中真武湯之類宜隨證與之

○傷寒脉浮而緩手足自温者繫在太陰太陰當發身黃若小便自利者不能發黃至七八日雖暴煩下利日十餘行必自止以脾家實腐穢當去故也

傷寒者熱病之名故以熱在腹者亦謂之傷寒也脉浮而緩者則非裏脉此痰熱浮於肌表也要畧曰脉浮而緩痰熱以行手足自温者是非裏結即脾氣不行水穀鬱蒸使然也故曰繫在太陰太陰者脾也脾主為胃行其津液者也今也脾氣鬱滯不能以宣行其津液祇鬱於肌膚而為熱也兼以小便不利故濕熱交盛勢必蒸身發黃若小便自

利者雖有熱不兼濕故不能發黃也其人到七八日既其反復之期來則脾家實而鬱熱離其根脚故為猝暴煩熱此欲解之兆也下利日十餘行其利必自止矣以向之小便利濕去故脾家之運轉漸進於是乎下利日十餘行而熱亦自去其病隨愈也脾家實謂脾氣行也腐穢謂瘀滯之渣糞也○本太陽病醫反下之因爾腹滿時痛者屬太陰也桂枝加芍藥湯主之

表證反下之誅伐無過斯傷胃陽故寒從內生因爾腹滿時痛是轉屬太陰也其滿其痛皆屬寒而

血脉凝滯故桂枝湯倍加芍藥以和腹裏也然則桂枝之溫居于芍藥之半其味尤陰重故能歸於腹已矣

○大實痛者桂枝加大黃湯主之

風冷乘於腹脾氣不行則食滯也故大實痛此宜以溫藥下之

桂枝加芍藥湯方 第八十五

桂枝 三兩 芍藥 六兩 甘草 二兩 大棗 十二枚

生薑 三兩

右五味以水七升煮取三升去滓分溫三服 本方

桂枝湯今加芍藥

桂枝加大黃湯方 第八十六

桂枝 三兩 大黃 二兩 芍藥 六兩 生薑 三兩

甘草 二兩 大棗 十二枚

右六味以水七升煮取三升去滓溫服一升日三服

玉函作大黃三兩諸註作一兩者非

○太陰為病脈弱其人續自便利設當行大黃芍藥者宜減之以其人胃氣弱易動故也

為字疑衍○太陰病以上文大實痛者言也脈弱者素稟胃陽弱故服桂枝加大黃湯後續自便利

也然有大實非下之不除設當行大黃芍藥而下之者宜減之而與也此之謂得法其人胃氣弱易動以弱脈之胃稟素虛故知也

右辨太陰病脈證并治 九章

辨少陰病脉證并治

按少陰者冬氣也。冬者天氣閉藏，水冰地凍，是以陽氣不奮，寒氣獨治。凡病多陰，少陽以似冬時之令者，此為少陰病也。夫在藏為腎，腎者元陽之居也。素稟元陽虛憊之人，得病即見陰證，下利益甚，遂致陽脫而四肢厥冷也。或吐下發汗，誤行之，頓奪陽氣，乃至四肢厥冷，此皆以亡陽也。是為少陰病。然又有熱證者也。表熱內陷，致脉厥體厥，或停食閉拒胸膈，以見手足逆冷者，亦隸之少陰病。此以外候似冬之令爾。

少陰之為病脉微細但欲寐也

少陰本是天之三陰，三陽六氣中之一，即謂冬氣。以冬者極陰之時，故尊陽稱少陰。猶十月謂之陽月也。在人體則臍下為少陰位，臍下乃元陽之居也。素問陰陽離合論曰：太衝之地，名曰少陰。夫冬者陽氣潛藏，寒冽盛行也。是以邪在陰分而陽氣虛脫，凡病作冬之象者，皆謂之少陰病也。脉微細者，陽虛之診，但欲寐者，夜陰之象。多陰少陽，精神乏，故爾。此以陰盛陽弱，似冬時閉藏之令，故為少陰病之篇首也。本篇曰：少陰病欲解時，從子至寅。

上是一日之冬可見少陰病作冬之象也

○少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也

此謂腎虛陽弱之人傷於寒曰少陰病也陰盛而上拒故欲吐不吐心煩也陰凝陽閉故但欲寐也五六日自利而渴者腎為胃關腎衰故失其禁約素問脉要精微論曰倉廩不藏者是門戶不要也下利甚則津液枯竭故為渴也虛故引水自救者

此舉虛字而釋渴字以明其非熱渴也若其人小便色白者元陽虛寒無疑矣故曰少陰病形悉具下焦指元陽而言也末句重明非裏熱也

○病人脉陰陽俱緊反汗出者亡陽也此屬少陰法當咽痛而復吐利

緊為寒肅之診夫尺寸俱緊者太陽傷寒也太陽傷寒不應有汗而反汗出者陽虛不固也故曰亡陽亡讀作無此以無陽陰獨故為屬少陰也蓋咽者面部之黃泉即為津唾之所出也津唾屬腎液之上朝故少陰病法當咽痛以津枯寒凝故也元

陽已虛寒邪入之無水穀以化是故咽痛而復吐利也後漢方技正真傳曰漱舌下泉咽之

○少陰病欬而下利譫語者被火氣劫故也小便必難以強責少陰汗也

夫咽痛必欬加以下利是確乎少陰病也而譫語者醫誤行火劫汗法徒亡其津液胃燥遂延蔓心家是以為譫語也小便難者亦汗出而津液內竭故也強責謂壓求汗此燒瓦熨背之類

○少陰病脉細沉數病為在裏不可發汗

此謂陰虛火動曰少陰病也脉細沉數為陰虛發

熱之診素問脉要精微論曰有脉俱沉細數者少陰厥也此非外來之邪熱故曰病為在裏不可發汗

○少陰病脉微不可發汗亡陽故也陽已虛尺脉弱濇者復不可下之

脉微者陽氣不充故不可發汗尺脉弱濇者真陰不足故復不可下之俱是腎虛之候故曰少陰病也縱有熱是陰虛發熱非滋補不除乃非汗下之所對也

○少陰病脉緊至七八日自下利脉暴微手足反温

脉緊反去者為欲解也雖煩下利必自愈

陽虛受寒其脉則緊是乃少陰病也七八日陽氣回復之期也易曰反復其道七日來復夫人者從乎天行也當此之時自下利者寒邪將解也然因下利而津液下奪故脉暴微也手足反溫者寒邪泄於下陽幸不見凌動而以順行也脉緊反去者寒已解之徵故為欲解也雖煩下利而陽回寒去故必自愈脉法曰緊去人安

治 ○少陰病下利若利自止惡寒而踈臥手足溫者可

陽虛之人卒然受寒邪則胃中冷而水穀不留下利也若利自止者此為利寒去陽幸不致于脫也惡寒而踈臥者其人欲得溫未得之狀手足溫者胃陽仍在其不遠復故曰可治

○少陰病惡寒而踈時自煩欲去衣被者可治

此與上條接也故不言下利矣惡寒而踈即陽求伸也時自煩欲去衣被是有陽氣挽回之機也夫時與欲乃非虛陽暴脫者比故曰可治欲字最妙

○少陰中風脉陽微陰浮者為欲愈

元陽虛憊之人肌表留風邪謂之少陰中風也陽

微陰浮即尺寸俱微浮之謂微者邪不暴也浮則邪出於表也故為欲愈

○少陰病欲解時從子至寅上

少陰王於子其病欲解自得其位而起也凡陰證及深更不劇者是有耐陰之力陽遂可復也解不解可試於此時也此則少陰二字註脚

○少陰病吐利手足不逆冷反發熱者不死脈不至者灸少陰七壯

陰寒吐利法當厥逆者以無陽也手足不逆冷反發熱者其人陽氣仍在也故不死脈不至者此為

吐利暴虛陰陽氣不能相接續故爾所以灸之者欲其有可生之道故通其經脈以遂其生也少陰謂原穴太谿今按臍下氣海丹田

○少陰病八九日一身手足盡熱者以熱在膀胱必便血也

陰寒吐利此為少陰病也已吐利而津液枯少是故不輸水精於膀胱膀胱無水則血瘀血瘀則熱蓄其人至八九日當寒去陽復之時而一身手足盡熱也此裏熱達於肌表然矣夫膀胱有熱必小便便血也而解矣

○少陰病但厥無汗而強發之必動其血未知從何道出或從口鼻或從目出者是名下厥上竭為難治
玉函及諸註無出者之者字○少陰病但厥謂厥之外無他候也醫欲溫散其寒厥強求之汗乃以火熏之或燒瓦熨之也蓋取汗而不得汗則火氣迫于內必動其血或從口鼻或從目出難預定其所出也故曰未知從何道出然火勢逆行必出于陽竅也但厥為下厥血亡於上為上竭若此者氣耗血竭故為難治

○少陰病惡寒身踈而利手足逆冷者不治

少陰病固虛寒故惡寒身踈而利因茲有胃陽亦欲脫之道而手足逆冷者內外寒極也故不治

○少陰病吐利躁煩四逆者死

少陰病虛寒可知也上吐下瀉是絕水穀滋養之道其人躁煩者精神將去之候四逆者切迫死也以上三條曰難治曰不治曰死者此有緩急之分爾蓋曰難治者良工為治復有其可生之日也曰不治者死期之緩也曰死者死期之急也

○少陰病下利止而頭眩時時自冒者死

少陰病下利止有二焉有寒去陽回而止者有胃

中水穀竭而止者。此條下利止者水穀已竭也。此失其滋養之道。故清陽不徹。濁陰不降。是以頭眩。時時自冒也。頭眩謂動時。頭目眩暈也。時時自冒。謂不動時。亦頭目昏冒。且神識不清。此則虛候之甚也。故死。

○少陰病四逆惡寒而身踈。脈不至不煩而躁者死。少陰病四逆惡寒而身踈。總是無陽候。且脈不至。不煩者。基址已壞也。其人手足躁擾者。精神既散。亂之候。是何恃何俟。不謂死而何。

○少陰病六七日息高者死。

息者呼吸氣也。高謂吸不到于臍下也。言本實先撥不能復歸於氣海。但從胸膈出氣而已耳。夫脈氣雖至。生氣獨絕於內也。故死。

○少陰病脈微細沉。但欲臥。汗出不煩。自欲吐。至五六日自利復煩躁不得臥寐者死。

脈微細沉為陽脫在裏之診。其人但欲臥者。多陰少陽精神乏故也。汗出不煩者。陽往不復也。自欲吐者。陰盛上拒也。蓋陰行也。鈍故其證雖劇也。引日至五六日。然而自利者。下部失其禁約故也。復煩躁不得臥寐者。陽欲絕而擾亂也。初之時但欲

臥今則不得臥寐此孤陽將亡之候也故死

○少陰病始得之反發熱脉沉者麻黃細辛附子湯主之

此言表證之少陰病也夫發熱脉浮者邪壅於表但與身內之陽氣相爭故其脉浮也發熱而脉不能浮反沉者寒勝陽負此屬元陽虛憊之人故為少陰病也少陰本應無熱而發熱故曰反蓋發熱為邪在表然裏陽不能協應故其脉沉也此以表有邪裏無陽也温熱劑發之

麻黃細辛附子湯方 第八十七

麻黃 二兩 細辛 二兩 附子 一枚

右三味以水一斗先煮麻黃減二升去上沫內諸藥煮取三升去滓温服一升日三服

麻黃開腠理發汗細辛氣温味大辛氣厚于味故有通關竅之功是以發寒邪于裏也附子大温托住其裏使真陽不至隨汗散脫也蓋此證也寒勝陽負故無喘嘔證此麻黃之所以藉力於細辛附子也

○少陰病得之二三日麻黃附子甘草湯微發汗以二三日無證故微發汗也

玉函脉經及諸註證之上有裏字○此亦發熱脉
沉故曰少陰病也此比始得之畧多一二日矣日
數多而無裏證寒邪所入尚淺故微發汗也無裏
證謂無吐利厥逆證也但發熱脉沉無餘證已

麻黃附子甘草湯方 第八十八

麻黃 二兩 甘草 二兩 附子 一枚

右三味以水七升先煮麻黃一兩沸去上沫內諸藥
煮取三升去滓溫服一升日三服

前方去細辛加甘草其藥勢輕乎前方矣

○少陰病得之二三日以上心中煩不得臥黃連阿

膠湯主之

少陰病得之謂得吐利厥逆證也二三日以上謂
二三日以後也蓋少陰病吐利卒暴而津液無幾
且與溫劑及灸法以復其陽雖然亦因茲陰耗熱
生故心中煩不得臥也此則似梔子豉湯證然以
陰虛鬱熱也此湯主之

黃連阿膠湯方 第八十九

黃連 四兩 黃芩 二兩 芍藥 二兩 雞子黃 二枚

阿膠 三兩 一挺

右五味以水六升先煮三物取二升去滓內膠烱盡

小冷內雞子黃攪令相得温服七合日三服

玉函及諸註作黃芩一兩又六升作五升○黃連黃芩瀉心中鬱熱芍藥調血泄熱雞子黃補陰解熱毒阿膠接續津液也蓋少陰病吐利厥逆脉不至則內與温劑外用灸法然後陽回熱發焉先是既吐且利津液殆竭今遽然變熱是以心中煩不得臥也乃與此湯而解熱生陰為全

○少陰病得之一二日口中和其背惡寒者當灸之附子湯主之

陽虛之人受寒邪謂之少陰病也口中和謂不苦

不燥舌無胎滑此言裏無熱候也其背惡寒者陽弱陰勝之常故灸之輔其治主以附子湯此見不効放手用温法也

附子湯方 第九十

附子 二枚 茯苓 三兩 人參 二兩 白朮 四兩 芍藥 三兩

右五味以水八升煮取三升去滓温服一升日三服

此於真武湯方中去生薑加人參者也彼以逐水氣為主此以補虛為主故多附子白朮之分兩矣附子人參補虛益陽白朮茯苓行脾氣除痰水芍

藥通順血脉以和腹裏

○少陰病身體痛手足寒骨節痛脉沉者附子湯主之

寒邪襲身體榮衛之行爲之阻滯故身體痛骨節痛手足寒其人本陽弱故不能與外寒相爭是以有寒無熱因爲少陰病也其脉沉者寒勝陽負之診乃與附子湯以溫裏散寒也

○少陰病下利便膿血者桃花湯主之

少陰病本是寒證故或灸之或用附子劑以回陽溫裏也而下利厥逆不止者愈與之不已是故裏寒轉成熟瀉泄變成膿血利也此與前條少陰病二三日以上心中煩不得臥者義同

桃花湯方 第九十一

赤石脂 一斤一斤一半全 乾薑 一兩 粳米 一升

右三味以水七升煮米令熟去滓溫服七合內赤石脂末方寸匕日三服若一服愈餘勿服

赤石脂其味甘其氣溫其體重其性瀉瀉而重故能收濕止血而固下今按有止血之功則去血熱可知也乾薑溫胃粳米養胃下利膿血隨愈

○少陰病二日至四五日腹痛小便不利下利不

止便膿血者桃花湯主之

下利不止便膿血者此非初發之證故曰少陰病
二三日至四五日初之時吐利厥逆故投熱藥或
用灸法以治之而雖陽回厥愈然熱藥灸法搏血
成膿其蓄積之處即於腹作痛也小便不利者吐
利甚而津液不足故也下利不止者迫于滑脫石
脂溢劑以中之

○少陰病下利便膿血者可刺

此承上條復見其轉治之意也刺所以通壅瘀
瘀通則腹痛止便膿血自愈

○少陰病吐利手足逆冷煩躁欲死者吳茱萸湯主之

胃虛停食成此證謂之食厥也胃陽衰故吐利手
足逆冷也煩躁欲死者濁氣上逆而攻心故也夏
月食冷麵若生冷瓜果以傷其胃吐利腹痛煩發
反覆顛倒欲死者夏秋間往往有焉大凡此之類
也此證本陽明病也然吐利手足逆冷元陽將脫
故綱之少陰病矣

吳茱萸湯方

吳茱萸

一分

人參

三兩

生薑

六兩

大棗

十二枚

右四味以水七升煮取二升去滓温服七合日三服

○少陰病下利咽痛胸滿心煩猪膚湯主之

下利而津枯鬱熱隨生故咽痛也胸滿心煩乃陰虛容熱之證

猪膚湯方 第九十二

猪膚 一升

右一味以水一斗煮取五升去滓加白蜜一升白粉五合熬香和令相得分温六服

猪水畜也膚革外薄皮也津枯熱生者咽皮必糜爛痛也故用猪膚之調陰除熱者潤之所謂從其

類也白蜜潤燥除煩白粉白米粉也益胃生液

○少陰病二三日咽痛者可與甘草湯不差與桔梗湯

咽者面部之地位即津唾之所出也津唾是屬腎液之上朝故以咽痛為少陰病也邪干於咽以結津唾故二三日咽痛宜先以甘草湯和緩其急也

甘草湯方 第九十三

甘草 二兩

右一味以水三升煮取一升半去滓温服七合日二

服

桔梗湯方 第九十四

桔梗 一兩 甘草 二兩

右二味以水三升煮取一升條辨補去滓分温再服

○少陰病咽中傷生瘡不能語言聲不出者苦酒湯

主之

下利而津枯鬱熱隨生故動咽中傷生瘡也生瘡者生疵也痛故不能語言且津枯痰結故聲不出也

苦酒湯方 第九十五

半夏 洗破如棗核十四枚 雞子 一枚去黃內上苦酒著雞子殼中

右二味內半夏著苦酒中以雞子殼置口環中安火上令三沸去滓少少含嚥之不差更作三劑

半夏開痰結能散津液之凝結俗治足豆粘糊貼之其効如神其能可推知也苦酒醋也消腫斂瘡卵白生膚外科治金瘡卵白苦酒水綿浸之以貼其瘡六七日愈以此其能可推也

○少陰病咽中痛半夏散及湯主之

咽中痛者風寒客於咽隘而結痰也故以半夏消痰桂枝散寒甘草緩其急

半夏散及湯方 第九十六

半夏 桂枝 甘草

右三味等分各別搗篩已合治之白飲和服方寸七
日三服若不能散服者以水一升煎七沸內散兩方
寸匕更煮三沸下火令小冷少少嚥之 半夏有毒
不當散服

末句八字玉函無之蓋後世註文

○少陰病下利白通湯主之

此曰少陰病者總無熱候脈微細但欲寐也其人
元陽虛憊胃陽不振外寒因而乘之故下利無度

種種危證隨峰起急投溫劑而復其陽以散其寒
也其用葱白而名白通湯者蓋通其陽則陰自消
之義

白通湯方 第九十七

葱白 四莖 乾薑 一兩 附子 一枚

右三味以水三升煮取一升去滓分溫再服

薑附辛熱從朔雪中鼓動一陽以成開泰之功也
其用葱白者隆冬凜冽百草皆萎軟軟葱葉獨不
畏寒其體中空而能通白根最長於通陽故以為
湯之名

○少陰病下利脉微者與白通湯利不止厥逆無脉
乾嘔煩者白通加豬膽汁湯主之服湯脉暴出者死
微續者生

此承上條復言其甚者也脉微者陽氣衰弱之診
即元陽虛也利不止厥逆無脉乃白通湯證其人
乾嘔煩者下利甚而陰亦枯虛熱內生是以純與
熱藥則拒之不受乾嘔煩益甚此以內無津液也
人尿性寒為下行豬膽水畜趣於下因加二味而
從其性使藥能納於胃中以回陽於無何有之鄉
庶得生矣雖然服湯脉暴出者無根之陽驟逆於

外與凝寒竟不相屬矣則相離而絕也故死微續
者真陽回而漸復也故生

白通加豬膽汁湯方 第九十八

葱白四莖 乾薑一兩 附子一枚 人尿五合

豬膽汁一合

右五味以水三升煮取一升去滓內膽汁人尿和令
相得分温再服若無膽亦可用

○少陰病二三日不已至四五日腹痛小便不利四
肢沉重疼痛自下利者此為有水氣其人或欬或小便
便利或下利或嘔者真武湯主之

少陰病二三日不已，謂陽弱之人伏寒邪，邪不已也。其人至四五日，腹痛是寒凝故也。寒凝則陽愈不行，陽不行則氣化不行，故小便不利也。水氣外溢，則為四肢沉重而水壅，表氣故疼痛也。水不行則與穀不分，清故自下利。此皆為水氣之所致也。然以其人本陽弱，故水不行，乃陽虛為本，水氣為標。故以助陽為主，真武即玄武。宋避祖諱，改玄為真。玄武者，北方之神，治水命名，取義於此。

真武湯方

茯苓 三兩 芍藥 三兩 白朮 二兩 生薑 三兩

附子一枚

右五味以水八升，煮取三升，去滓，溫服七合，日三服。若欬者，加五味子半升，細辛一兩，乾薑一兩。若小便利者，去茯苓。若下利者，去芍藥，加乾薑二兩。若嘔者，去附子，加生薑足前為半斤。王丞及諸註為作成

附子溫之，以復其陽。芍藥通順血脈，以調停之。白朮行脾氣，以逐水氣。茯苓滲水道，以通陽氣。生薑助胃中宣發之氣，以散心下。飲且使藥氣能散漫於四旁也。於是陽復於根，虛寒乃去，水氣自消。

○少陰病下利清穀，裏寒外熱，手足厥逆，脈微欲絕。

身反不惡寒其人面色赤或腹痛或乾嘔或咽痛或利止脉不出者通脉四逆湯主之

此裏寒外熱證裏寒故下利清穀手足厥逆脉微欲絕也外熱故身反不惡寒其人面色赤也此寒甚於內格陽於外不能相通故也

通脉四逆湯方 第九十九

甘草二兩 附子一枚 乾薑三兩

右三味以水三升煮取一升二合去滓分温再服其

脉即出者愈 面色赤者加葱九莖 腹中痛者去

葱玉函無 加芍藥二兩 嘔者加生薑二兩 咽痛

者去芍藥玉函無 加桔梗一兩玉函無 利止脉不出

者去桔梗玉函無 加人參二兩 病皆與方相應者

乃服之

此增薑附之分兩別命通脉之名也末句十字玉函無之蓋註者之言

○少陰病四逆其人或欬或悸或小便不利或腹中痛或泄利下重者四逆散主之

四逆四肢逆冷即謂厥之始也夫陽脫四逆理固然矣又熱陷於裏能使人四逆也此證雖裏無壅滯但外熱內陷以為四逆故此方作湯與之則熱

復出於表也。若裏有壅滯者，非承氣湯不能矣。蓋此證固陽證也。然以四逆為外候，故屬諸少陰病也。

四逆散方 第一百

甘草 枳實 柴胡 芍藥

右四味各十分，搗篩，白飲和服，方寸匕，日三服。欬者加五味子、乾薑各五分，并主下利。悸者加桂枝五分。小便不利者加茯苓五分。腹中痛者加附子一枚。泄利下重者，先以水五升煮之，疑內之，誤。薤白三升，煮取三升，去滓，以散三方寸匕內湯中，煮取一升半，分溫再服。

服

柴胡升發裏熱，枳實破結氣，使胃陽能順達芍藥通順血脈而泄邪熱，甘草扶中氣而達諸四旁，按此方也。本當作湯，然名四逆散者，能發散四逆之裏熱，故爾不獨四逆散為然。五苓散半夏散亦然。三方俱作湯，皆以得汗為要也。後加減法，疑非仲景之舊矣。以是言之，本條其人以下至下重，亦是後人之補綴也。

○少陰病下利六七日，欬而嘔，渴心煩不得眠者，豬苓湯主之。

下利六七日水穀俱出於廣腸而水道爲之熱秘氣化不行則水留於心下故上逆爲欬爲嘔也氣道壅塞而呼吸燥故爲渴也水道熱秘則上下失和故心煩不得眠因行利前竅導水之法也

豬苓湯方

豬苓

茯苓

阿膠

澤瀉

滑石

兩各一

右五味以水四升先煮四物取二升去滓內阿膠烱盡溫服七合日三服

○少陰病得之二三日口燥咽乾者急下之宜大承

氣湯

病人手足厥冷脉沉伏者此爲少陰病言病似冬令也得之二三日非初病之二三日乃得少陰之見證而二三日也其人口燥咽乾者此非陰證明是裏證熱極也夫胃中壅鬱陽氣不能敷布於外即四肢未免厥逆又安能榮氣得速行因而脉致沉伏也然裏熱上衝口燥咽乾至是則投承氣湯不可遲滯故曰急下之蓋所以名承氣湯者醫投此湯除其熱結則裏氣復發諸外而形體無不承順故名承氣湯也

大承氣湯方

枳實五枚 厚朴半斤 大黃四兩 芒消三合

右四味以水一斗先煮二味取五升去滓內大黃更煮取二升去滓內芒消更上火令一兩沸分温再服一服得利止後服

○少陰病自利清水色純青心下必痛口乾燥者可下之宜大承氣湯

玉函及諸註可作急○熱伏於裏脈為沉伏或為四逆者此為少陰病也自利清水則無穀滓色純青則無穀色此水自流而穀自留故心下必痛也

口乾燥者即裏熱之徵乃熱結傍流證以其人胃家實內熱壅閉先大便閉結續得下利純臭水全然無糞日三四度或十數度大承氣湯下之則得結糞而利立止

○少陰病六七日腹脹不大便者急下之宜大承氣湯

此本四逆散證延至六七日而腹脹不大便者裏證已極也故急下之

○少陰病脈沉者急温之宜四逆湯

此真少陰病也陽氣不奮故其脈沉也初頭脈沉

未有形證不知邪氣所之將發何病是急可與四逆湯溫之不必果四逆而後用之也

四逆湯方

甘草二兩 乾薑一兩 附子一枚

右三味以水三升煮取一升二合去滓分溫再服強人可大附子一枚乾薑三兩

○少陰病飲食入口則吐心中溫溫欲吐復不能吐始得之手足寒脉弦遲者此胸中實不可下也當吐之

停食閉膈手足寒此為少陰病也飲食入口則吐

者膈中有物故不受之也心中溫溫乃惡心之狀欲吐復不能吐者是宿實之甚也始得之手足寒脉弦遲者食窒于胸中陽氣不能以宣越於外故也此唯宿實於胸中故為不可下也當吐之宜瓜蒂散而不言其治者以有其餘也

若膈上有寒飲乾嘔者不可吐也當溫之宜四逆湯虛寒從下上而阻留其飲于胸中究非胸中之病也但當責陽之不足故曰當溫之

○少陰病下利脉微瀋嘔而汗出必數更衣反少者當溫其上灸之

下利脉微瀉陰陽俱虛衰之診裏陽衰不能以留穀故嘔表陽不固故汗出必數更衣者陽虛則氣下墜也反少者以向之下利若嘔必津液不足故爾此以其人本陽微諸證蜂起故單用溫法救之也溫其上謂由口投溫劑而回胃陽也灸之者灸臍下丹田氣海以復元陽也靈樞官能篇曰陰陽皆虛火自當之

右辨少陰病脉證并治凡四十五章章

傷寒雜病論集解卷八 畢

傷寒雜病論集解卷第九

日本 醫師法眼細夫東安惟貞著

辨厥陰病脉證并治

按厥盡也厥陰者陰盡陽生之謂即謂初春氣也本篇曰厥陰病欲解時從丑至卯上是一日之春此時兩陰交盡故曰厥陰也夫春者雖陽氣上騰然餘寒尚在而寒暖未定也是故凡病或寒或熱互發而寒熱相半以似春時氣候者名曰厥陰病也。有寒伏熱者有熱伏寒者有上熱下寒者有上

寒下熱者有表寒裏熱者有表熱裏寒者有陽證見陰脈者有陰證見陽脈者大凡物阻塞陽氣以見寒證者謂之厥陰病也物者何也曰邪毒曰虵蟲曰寒曰飲曰食凡若此者留滯于胸膈皆是閉陽而見寒證故曰厥陰病也

厥陰之為病消渴

末句疑脫也字此七字本為一條叔和誤連接下條矣○厥陰本是天之三陰三陽六氣中之一即謂初春氣此時陰盡陽生故曰厥陰也凡病外證陰而內伏陽卒寒去陽回以似春時氣候者皆謂

之厥陰病素問陰陽類論曰一陰至絕作晦朔其斯之謂與厥陰之為病者包病人手足厥冷而言也消渴能飲且能多而其水似乎內自消故曰消渴也言病人為手足厥冷而煩渴好飲此雖外見寒證然裏伏大熱乃屬裏證熱極是應下之證也內熱壅鬱不及陽於表故為四肢厥冷甚者致脈厥體厥便是大承氣湯證此外證陰而內伏陽猶春時氣候也即是篇中之大旨
○氣上撞心中疼熱饑而不欲食食則吐衄下之利不止

章首當補厥陰病三字○此虵蟲證胸上有熱腹
中有寒及上熱下寒寒熱相半故為厥陰病也胃
虛藏寒虵上入膈故氣上撞心中疼熱也胃中
食乏膈中有虵故饑而不欲食也食則吐虵者食
則嘔嘔則虵出也此與烏梅丸而溫胃安虵可矣
胃虛藏寒下之裏寒增甚故利不止

○厥陰中風脈微浮為欲愈不浮為未愈

風熱入於裏為手足微冷者謂之厥陰中風也脈
微則邪不暴之診浮者出於表之脈故不浮為未
愈

○厥陰病欲解時從丑至卯上

厥陰王於丑其病欲解自得其位而起也言厥陰
病者陰盡陽回則愈此厥陰二字註脚即是仲景
秘傳余得之夢寐之際也已

○厥陰病渴欲飲水者少少與之愈

厥陰病以手足寒言也雖病人為手足厥冷而外
見寒證然熱伏在裏故渴欲飲水是乃厥陰病也
其人渴欲飲水當酌量與之勿極意恐傷胃陽也
設與之得法則胃中和大汗出而解

○諸四逆厥者不可下之虛家亦然

四逆者厥之始厥即四逆之極也以常言之四逆即陽脫之候以為不可下也當溫之設以變言之熱極四逆非下之不除故下條曰厥應下之虛家與陽脫四逆同例故曰亦然

○傷寒先厥後發熱而利者必自止見厥復利

凡傷於寒之人厥利者寒勝陽自也先厥後發熱而利者陽復寒去也故必自止焉而見厥者陽未復也故復利此寒熱互見陰陽相半故隸諸厥陰病也

○傷寒始發熱六日厥反九日而利凡厥利者當不

能食今反能食者恐為除中食以索餅不發熱者知胃氣尚在必愈恐暴熱來出而復去也

不發熱之不字疑而之誤此可見下文其熱續在而知也○傷寒以厥利言也凡厥利者寒勝陽不行何至消磨水穀而能食今反能食者恐為除中除去也中以胃言也言胃氣欲除去暴發露也試以索餅食之而發熱者自是胃陽在內能消磨水穀故可懸斷其必愈也若其除中則暴熱來出而復去也索餅索麵也食之取其易化也

後三日

宋板脫三字今從玉函諸註補之脈之其熱續在者期之且

庚子書奇

日夜半愈所以然者本發熱六日厥反九日復發熱三日并前六日亦為九日與厥相應故期之且日夜半愈後三日脉之而脉數其熱不罷者此為熱氣有餘必發癰膿也

其熱續在謂食索餅後發熱者也且日夜半且日夜半之間即丑寅時此陰盡陽生之時也所以然者以下反覆申明上文之意也後三日九日後也若熱氣有餘其病雖愈或留連于肉腠其後必發癰膿也此熱與厥陰陽相半故隸諸厥陰病也

○傷寒脉遲六七日而反與黃芩湯徹其熱脉遲為

寒今與黃芩湯復除其熱腹中應冷當不能食今反能食此名除中必死

傷寒以厥利言也脉遲則胃中之陽薄厥利可察也六七日反復之期發熱可知也脉遲為寒此當用温法而醫見其發熱乃與黃芩湯温覆取汗斯謂之徹其熱也徹者除去也脉遲為寒是釋上文之脉意也寒則胃中陽氣既薄不可更徹其熱而反與黃芩湯復除其熱腹中應冷胃煖乃能納食胃冷不能納食是其常也今反能食者暴熱使之消也此名除中胃氣欲絕革其職猶燈之將滅必

暴明也故主死此寒證而能食乃除中證故隸諸厥陰病也

○傷寒先厥後發熱下利必自止而反汗出咽中痛者其喉為痺

此亦以厥利言也厥以得熱為陽回陽回則下利必自止而反汗出者此為熱氣有餘也以其人下利故津液枯竭加之熱氣有餘則津唾不到咽但熱氣上行其喉為痺痛也咽食道也喉氣道也發熱無汗而利必自止若不止必便膿血便膿血者其喉不痺

其有汗者熱氣上行而燥津唾故熱聚於咽其喉所以為痺也其無汗者熱不外泄但聚於內然利自止者不為熱氣有餘也若利不止者必便膿血此為熱氣有餘也下行則不上升故便膿血者其喉不痺此寒熱勝復以似春時氣候故隸諸厥陰病也

○傷寒一二日至四五日厥者必發熱前熱者後必厥厥深者熱亦深厥微者熱亦微

傷寒以時疫言也一二日至四五日謂其始也其病自始厥者邪氣大甚以阻榮衛之道格陽於內

不及於表故先凜凜惡寒四肢厥逆續起陽氣漸
積鬱極而通則厥回而中外皆熱故曰一二日至
四五日厥者必發熱也前大熱者津液早耗胃中
自成壅鬱陽氣不能以敷布於外於是在表之邪
亦從內陷故曰前熱者後必厥也厥深者熱亦深
厥微者熱亦微者以厥之微甚而試熱之輕重所
以定其藥之緩急大小也

厥應下之而反發汗者必口傷爛赤

此因內熱之極而失坤元資生之道是以四傍不
承順故手足厥逆宜枳朮消黃下之以通其內結

此承氣之名所由起也醫者不究裏證熱極誤認
為表寒乃以辛溫發汗則助其升散故胃熱上衝
必口傷爛赤也蓋以發汗為其誠者為示此證必
非死證爾此熱病而見寒候乃外陰內陽故隸諸
厥陰病也

○傷寒病厥五日熱亦五日設六日當復厥不厥者
自愈厥終不過五日以熱五日故知自愈

厥者邪氣勝也熱者正氣復也一勝一復恰恰相
當其後不復厥者正氣內復陰陽已和順故知自
愈也五日字大約不過以日準其多少焉此傷寒

下利厥病之註脚

○凡厥者陰陽氣不相順接便為厥厥者手足逆冷者是也

玉函及諸註無逆冷者之者字○厥有寒熱二證故曰凡厥者陰陽謂內外也內外之氣不和順接續即便為厥內者不出故外者陷入也逆冷者手足梢先冷過肘膝也此厥字之註脚

○傷寒脉微而厥至七八日膚冷其人躁無暫安時者此為藏厥非蚘厥也

傷寒以厥利言也脉微而厥統藏厥蚘厥而言夫

脉微而厥則陽氣衰微可知矣然未定其為藏厥蚘厥也至七八日不獨手足冷而至周身之膚亦冷其人躁無暫安時者此為藏厥也藏猶言裏也其厥起乎裏即元陽虛也用四逆及灸法亦無及矣又蚘厥者為蚘為厥此為藏寒也則如下文

蚘厥者其人當吐蚘令病者靜而復時煩者此為藏寒蚘上入其膈故煩須臾復止得食而嘔又煩者蚘聞食臭出其人當自吐蚘蚘厥者烏梅丸主之又主久利

玉函及諸註無時煩者之者字及其膈之其字○

蛭厥雖亦如藏厥脉微而厥此非暫無安時之劇
 但令病者靜而復時煩此為藏寒也藏寒者裏寒
 之謂即胃中有冷寒也胃寒則蛭不安其居但欲
 避寒就溫猶夏月蚯蚓出於地上故胃寒則蛭上
 入膈所以煩也須臾復止者生物上下無常也得
 食而嘔者蛭在膈上故也又煩者蛭聞食臭出其
 人當自吐蛭者食則蛭得其食而躍踴撓動嘔吐
 隨起蛭與食俱出是以煩也宜溫胃安蛭又主久
 利者藏寒蛭蟲之久利治之也蓋藏寒蛭蟲則吐
 利俱治之謂此為蛭為厥猶餘寒抑春陽故隸諸

厥陰病也

烏梅丸方 第一百

烏梅三百枚 細辛六兩 乾薑十兩 黃連十六兩

當歸四兩 附子六兩 蜀椒四兩 桂枝六兩

人參六兩 黃蘗六兩

右十味異擣篩合治之以苦酒漬烏梅一宿去核蒸
 之五斗要畧玉函及諸註斗作升 米下飯熟擣成泥和藥令相得
 內臼中與蜜杵二千下丸如梧桐子大先食飲服十
 丸日三服稍加至二十九丸禁生冷滑物臭食等
 烏梅 黃連 黃蘗 安其 蛭 當歸 人參 補其 虛 蜀椒 細

辛乾薑桂枝附子温胃寒

○傷寒熱少微厥指頭寒嘿嘿不欲食煩躁數日小便利色白者此熱除也欲得食其病為愈若厥而嘔胸脇煩滿者其後必便血

玉函及諸註微厥作厥微煩躁疑煩燥之誤○熱既少厥亦微僅指頭寒此屬熱厥之輕者而熱與厥并現乃有欲自愈之機其人嘿嘿不欲食者熱鬱未解也煩燥煩熱燥渴即謂好飲不已也若煩燥數日則熱多寒少陽氣進也可知矣小便利其色白者是得飲而胃潤熱亦隨小便而解前條曰

厥陰病渴欲飲水者少少與之愈是也其人欲得食者中氣已和故其病為愈若厥而嘔者熱仍在胃中而胸脇煩滿者為熱氣有餘於內其後必得便血而解此厥與煩渴陰陽相半故隸諸厥陰病也

○病者手足厥冷言我不結胸小腹滿按之痛者此冷結在膀胱關元也

素問調經論曰陽受氣於上焦靈樞決氣篇曰上焦開發宣五穀味熏膚充身然則胸者陽氣之所積是故手足冷者先求之於胸也因問病者焉言

我不結胸則知其病不在胸也。此言非表熱之內陷矣。而行其腹診。小腹滿。按之且痛。此冷結在臍下也。臍下為元陽之居。乃生氣之原也。冷結於此。則周身陽氣為之所抑。故手足厥冷也。小腹以外言膀胱關元。以內言也。關元臍下三寸。穴名。即膀胱之所在也。言冷結在腎之外郭。乃有餘寒。抑春陽之象。故隸諸厥陰病也。

○傷寒發熱四日。厥反三日。復熱四日。厥少熱多者。其病當愈。四日至七日。熱不除者。必便膿血。

傷寒以厥利言也。下同。發熱者。病始發動也。始四

日之間。其人有利。可知矣。厥者。因下利而陽衰。故也。宜與四逆輩。以復其陽。然後熱復發者。陽回寒去。其病當愈。始厥三日。復熱四日。至七日。熱不除者。此為熱氣有餘。搏血為瘀。積久。必便膿血也。諸註必之上有其後二字。此有寒熱勝復。以似春時氣候。故隸諸厥陰病也。下同。

○傷寒厥四日。熱反三日。復厥五日。其病為進。寒多熱少。陽氣退。故為進也。

前條曰。傷寒先厥。後發熱而利者。必自止。見厥復利。夫發熱而利者。陽回寒去也。復厥者。因下利而

陽愈衰陽衰則寒邪無退息之期故曰陽氣退故
為進也進謂病加重也

△傷寒六七日脉微手足厥冷煩躁灸厥陰厥不還者死

此條義疑不可強解

○傷寒發熱下利厥逆躁不得臥者死

傷寒先發熱加以下利厥逆者即裏寒外熱證也躁不得臥者孤陽擾亂之候也故死夫發熱陽候也下利厥逆陰證也是陰陽相半故隸諸厥陰病下同

○傷寒發熱下利至甚厥不止者死

此雖無躁證然厥不止者無陽氣回復之期也故死

○傷寒六七日不利便發熱而利其人汗出不止者死有陰無陽故也

玉函作不便利忽發熱而利○傷寒始不便利暴忽發熱而利者陽馳於外內空之象也其人汗出不止者孤陽外散之候也此內外陽竭故曰有陰無陽夫發熱者陽候也利者陰病也乃陰陽相半故隸諸厥陰病

○傷寒五六日不結胸腹濡脉虛復厥者不可下此
亡血下之死

玉函及諸註此下有爲字○傷寒五六日承第十
一條傷寒一二日至四五日而言此既至五六日
則非邪毒之厥又不結胸且腹濡則非冷結在臍
下之厥但脉虛厥者是爲血虛之厥以脉者血之
府也復厥謂其再三厥也亡與無通亡血卽血虛
夫虛家不可下之下之重其虛也故死蓋此曰下
之死者不下之不死之意矣厥陰者春之氣也春
者餘寒尚在雖然陰盡陽生之時但調補氣血而

俟陽回耳故隸諸厥陰病也

○發熱而厥七日下利者爲難治

玉函及脉經首句有傷寒二字○易曰反復其道
七日來復夫人者從乎天行也傷寒發熱而厥七
日尚可望復也而至于下利隕其淵以裏氣虛而
陽愈難回也此熱厥俱在乃陰陽相半故隸諸厥
陰病也

○傷寒脉促手足厥逆可灸之

傷寒謂傷於寒而下利也下利脉促手足厥逆者
此因下利而裏虛故陽不得宣脉行隨跼蹐也灸

之使温從膚入則陽向表而宜也促為陽脉厥為陰證是半陰半陽故隸諸厥陰病也

○傷寒脉滑而厥者裏有熱白虎湯主之

玉函及諸註熱下有也字○滑為熱脉熱結於裏則為厥也一則用承氣湯一則用白虎湯者即以脉斷之夫滑者裏無壅滯也白虎湯主之沉者裏氣結滯也承氣湯宜之此熱厥俱在乃陰陽相半故隸諸厥陰病也

白虎湯方

知母 六兩 石膏 一斤 甘草 二兩 粳米 六合

右四味以水一斗煮米熟湯成去滓温服一升日三服

○手足厥寒脉細欲絕者當歸四逆湯主之

寒與冷同手足厥冷脉細欲絕者血虛挾寒脉行不利也血虛停寒不唯不可下并難用温法蓋恐薑附之僭而燥是以但和陽調陰而壯榮衛為治也又即此可該亡血之治焉此雖手足厥寒脉細欲絕然亦非死證但俟陽回耳故隸諸厥陰病也

當歸四逆湯方 第一百二

當歸 三兩 桂枝 三兩 芍藥 三兩 細辛 三兩

甘草 二兩 通草 二兩 大棗 二十五枚

右七味以水八升煮取三升去滓温服一升日三服

諸註作細辛二兩者非○桂枝甘草宜行陽氣當歸芍藥調血補陰通草細辛通閉行脉大棗助脾氣以壯榮衛

若其人內有久寒者宜當歸四逆加吳茱萸生薑湯
內有久寒者固滯之寒在內也又即此可該冷結在關元之治

當歸四逆加吳茱萸生薑湯方 第一百三

當歸 三兩 芍藥 三兩 甘草 二兩 通草 二兩

桂枝 三兩 細辛 三兩 生薑 半斤 茱萸 二升

大棗 五十枚

右九味以水六升清酒六升和煮取五升去滓分温

五服 一方水酒各四分

條辨作生薑三兩吳茱萸半升

○大汗出熱不去內拘急四肢疼又下利厥逆而惡寒者四逆湯主之

此裏寒外熱證乃寒熱兩在故隸諸厥陰病也裏寒故陽不斂於內但浮越於表是以大汗出熱不去也內指腹言也此津液亡而不榮於筋脉故腹

內拘急也。液脫而骨屬屈伸不利，故四肢疼也。素問曰：陽氣者，榮則養筋，宜與四逆湯以復陽，斂液也。又下利證厥逆而惡寒，陽從下脫者，主之。

四逆湯方

甘草^{二兩} 乾薑^{一兩} 附子^{一枚}

右三味以水三升煮取一升二合，去滓分溫再服。若強人可用大附子一枚，乾薑三兩。

○大汗若大下利而厥冷者，四逆湯主之。

此約上二節言也。內外雖殊，其亡津液損陽氣則一矣。

○病人手足厥冷，脈乍緊者，邪結在胸中，心下滿而煩，饑不能食者，病在胸中，當須吐之，宜瓜蒂散。

此辨停食之厥也。食滯於胸膈，則陽氣被阻於物而不得外達，以致厥也。乍者，暫之意。脈緊而不常往來中脘焉。一見也。要畧曰：脈緊如轉索無常者，有宿食也。邪結在胸中者，宿食在上脘也。心下滿而煩者，物阻故也。饑不能食者，滿故不能食，煩故心中如饑也。病在胸中，宜從上出之，故曰當須吐之一吐。陽煩宜焉。此停食阻陽之厥也。乃有餘寒抑春陽之象，故隸諸厥陰病，以陰盡則陽生也。

瓜蒂散方

瓜蒂 赤小豆

右二味各等分異擣篩合內臼中更治之別以香豉一合用熱湯七合煮作稀糜去滓取汁和散一錢七溫頓服之不吐者少少加得快吐乃止諸亡血虛家不可與瓜蒂散

○傷寒厥而心下悸宜先治水當服茯苓甘草湯却治其厥不爾水漬入胃必作利也

玉函服作與○此水飲蓄於心下以阻其陽之厥也要畧曰水停心下甚者則悸厥而心下悸者其

厥從水飲阻心下之陽來也故宜先治水素問陰陽應象大論曰治病必先求於本是也却治其厥言治水則其厥自愈也不爾水飲浸漬入於胃必作下利也蓋厥不治厥却治其水或治其食或治其蟲或治其熱而不一者皆是求於本之謂也此有餘寒抑春陽之象故隸諸厥陰病也

茯苓甘草湯方

茯苓二兩玉函 甘草一兩 生薑三兩 桂枝二兩

右四味以水四升煮取二升去滓分溫三服

○傷寒六七日大下後寸脉沉而遲手足厥逆下部

脉不至喉咽不利唾膿血泄利不止者為難治麻黃升麻湯主之

傷寒六七日者言表熱仍在之時也大下醫誤下之也寸脉沉而遲者本浮數脉變沉遲也其時表熱內陷但聚於內於是為手足厥逆也下部脉不至而逆於上部故喉咽不利此由被快藥下利重亡津液而津唾亦枯熱為之乘以為喉咽痺痛也其熱之所過血為之凝滯畜結癰膿終為肺癰及於其人既唾膿血而泄利不止者裏氣大虛更無力可送其邪故為難治末句接喉咽不利之句此

上熱下寒乃寒熱相半故隸諸厥陰病也

麻黃升麻湯方 第百四

麻黃二兩升麻一分當歸一分知母十八銖

黃芩十八銖萎蕤十八銖芍藥六銖

天門冬六銖桂枝六銖茯苓六銖

甘草六銖石膏六銖白朮六銖乾薑六銖

右十四味以水一斗先煮麻黃一兩沸去上沫內諸藥煮取三升去滓分溫三服相去如炊三斗米頃令盡汗出愈

麻黃升麻散上部之熱當歸芍藥調陰血泄邪熱

葶藶天門冬潤喉咽知母黃芩清燥熱之餘桂苓
木除心下逆滿甘草乾薑復下後之胃陽石膏爲
總藥之監制此以熱在喉咽也

○傷寒四五日腹中痛若轉氣下趣少腹者此欲自
利也

腹中痛者多虛寒若作轉氣雷鳴趣于下者此欲
自利也乃是陽回寒將去之兆故隸諸厥陰病也

○傷寒本自寒下醫復吐下之寒格更逆吐下若食
入口卽吐乾薑黃芩黃連人參湯主之

玉函無吐下之之下字○本自寒下者其人本胃

中虛寒使然也而醫誤認爲停食下利因復吐之
則胃中寒格胸中生鬱熱以至藥食俱不納故曰
更逆吐下言其因治逆而吐下俱不止也若食入
口卽吐者胃中寒格胸中有鬱熱而不受食也芩
連苦寒解胸中鬱熱人參乾薑溫補其胃此以胃
中有寒胸上有熱故隸諸厥陰病也

乾薑黃芩黃連人參湯方 第百五

乾薑 黃芩 黃連 人參 各三兩

右四味以水六升煮取二升去滓分溫再服

○下利有微熱而渴脉弱者令自愈

下利裏寒也。有微熱而渴者，陽漸回，內燥未復也。脈弱者，邪已退而經氣虛也。令自愈者，不須治也。夫下利者，裏寒乃陰病也。有微熱而渴者，證已轉陽也。是寒去，陽回，猶春時氣候，故隸諸厥陰病也。下同。

○下利脈數有微熱汗出，令自愈。設復緊為未解。

下利脈數有微熱者，寒邪已化熱也。汗出則熱解，故令自愈。設復緊者，虛寒仍在而陽未復也。故為未解。

○下利手足厥冷無脈者，灸之不溫。若脈不還，反微。

喘者死。

灸之無其效，反微喘者，孤陽隨火氣上脫也。故死。此下利與喘寒熱兩證，故隸諸厥陰病也。

○少陰負趺陽者為順也。

少陰指下利而言，趺陽指胃氣而言也。少陰者腎也，腎為胃關，腎衰則下利。故指陰寒下利謂之少陰也。趺陽者足陽明穴名，陽明者胃也。故指胃氣謂之趺陽也。少陰負，趺陽者為順也者，言下利而飲食不衰，胃氣尚在者，其病易愈也。故曰為順也。素問玉機真藏論曰：漿粥入胃，泄注止，則虛者活。

此之謂也。夫少陰跌陽陰陽對待故辨之於此。

○下利寸脉反浮數尺中自濇者必清膿血。

下利脉反浮數此為熱氣有餘也。尺中自濇者津液不足但血濇而瘀蓄也。血熱相搏必便膿血清與圍通此下利與浮數寒熱兩在故隸諸厥陰病也。

○下利清穀不可攻表汗出必脹滿。

下利清穀者裏虛也。裏虛者當惡寒誤認表證不可發其汗。汗出則陽從外泄濁陰內填以成脹滿也。素問異法方宜論曰藏寒生滿病此下利與惡

寒表裏俱在故隸諸厥陰病也。

○下利脉沉弦者下重也。脉大者為未止脉微弱數者為欲自止雖發熱不死。

沉弦為裏急之診。下重者裏急後重即痢證也。脉大者邪盛之診故為未止。脉微弱者邪氣衰矣。數則陽氣復故為欲自止。雖其人發熱也。汗出則解。故曰不死。此下利與脉大或數陰陽兩在故隸諸厥陰病也。

○下利脉沉而遲其人面少赤身有微熱下利清穀者必鬱冒汗出而解病人必微厥所以然者其面戴

陽下虛故也

沉為在裏遲則為寒面少赤身有微熱者仍兼外邪也下利清穀者裏寒故也其人表邪欲解臨其汗之時以裏先虛也必鬱冒太陽篇曰冒家汗出自愈所以然者汗出表和故也病人必微厥者以未解前言即鬱冒中之一證也裏寒故厥也陽虛不甚故其厥微也戴陽以面少赤身有微熱言也下虛以下利清穀言也此表熱裏寒乃陰陽兩在故隸諸厥陰病也

○下利脈數而渴者令自愈設不差必清膿血以有

熱故也

下利脈數而渴者胃陽已復也故令自愈設不差者為熱氣有餘必清膿血陽明篇曰脈數不解而下不止必協熱便膿血此下利脈數乃陰陽兩在故隸諸厥陰病也

○下利後脈絕手足厥冷時脈還手足溫者生脈不還者死

下利脈絕手足厥冷用溫法及灸法而脈還手足溫者生若過時而脈不還手足不溫者雖不喘亦末如之何也已時周時也此寒谷回春之象

故隸諸厥陰病也。

○傷寒下利日十餘行脈反實者死

下利者裏虛也。脈當微弱而反實者是為邪盛邪盛必正脫也。故死。素問玉機真藏論曰泄而脈大脫血而脈實者難治。此下利脈實陰陽相反故隸諸厥陰病也。

○下利清穀裏寒外熱汗出而厥者通脈四逆湯主之

下利清穀起乎裏寒也。裏寒故陽不斂於內陽不斂故外熱外熱故汗出汗出故厥也。治法以復陽

為主素問陰陽別論曰陰爭於內陽擾於外魄汗未藏四逆而起起則熏肺使人喘鳴陰之所生和本曰和此裏寒外熱猶春時寒暖俱在故隸諸厥陰病也。

通脈四逆湯方

甘草二兩 附子一枚 乾薑三兩 強人可四兩

右三味以水三升煮取一升二合去滓分温再服其脈即出者愈

○熱利下重者白頭翁湯主之

熱利熱毒利也。下重後重也。夫利者陰病也。熱者

慶壽詩補

陽候也。是陰陽相半。故隸諸厥陰病。

白頭翁湯方 第百六

白頭翁 二兩 黃蘗 三兩 黃連 三兩 秦皮 三兩

右四味以水七升煮取二升去滓溫服一升不愈更服一升

玉函及諸註作白頭翁三兩。○白頭翁苦寒逐血止腹痛弘景曰止毒痢黃蘗黃連秦皮俱苦寒除熱

○下利腹脹滿身體疼痛者先溫其裏乃攻其表溫裏宜四逆湯攻表宜桂枝湯

下利腹脹滿者裏寒也。故溫其裏。身體疼痛者表實也。故攻其表。治法先溫其裏。清便已。調身體疼痛仍在。乃攻其表也。下利腹脹裏寒也。身體疼痛表熱也。此以寒熱俱在。故隸諸厥陰病。

桂枝湯方

桂枝 三兩 芍藥 三兩 甘草 二兩 生薑 三兩 大棗 十二枚

右五味以水七升煮取三升去滓溫服一升須臾飲熱稀粥一升以助藥力

○下利欲飲水者以有熱故也。白頭翁湯主之。

下利欲飲水者縱未顯下重之候亦當以前湯勝其熱也下利陰病也欲飲水者陽候也是陰陽相半故隸諸厥陰病

○下利譫語者有燥屎也宜小承氣湯

下利但下臭水則內愈燥滯愈乾澇此為有燥屎也。有燥屎必譫語下之乃解夫下利陰病也。譫語陽證也是陰陽相半故隸諸厥陰病

小承氣湯方

大黃四兩 枳實三枚 厚朴二兩

右三味以水四升煮取一升二合去滓分二服初一

服譫語止若更衣者停後服不爾盡服之

○下利後更煩按之心下濡者為虛煩也宜梔子豉湯

下利後津液燥是以心胸不得液故虛煩也此無物而煩因名虛煩夫下利陰病也煩者陽候也是陰陽相半故隸諸厥陰病

梔子豉湯方

肥梔子十四箇 香豉四合

右二味以水四升先煮梔子取二升半內豉更煮取一升半去滓分再服 一服得吐止後服

○嘔家有癰膿者不可治嘔膿盡自愈

此肺癰之類有膿故嘔膿盡嘔自止也治不從嘔故曰不可治嘔夫嘔者裏病也既有癰膿必有惡寒表證此以表裏俱在故隸諸厥陰病也

○嘔而脈弱小便復利身有微熱見厥者難治四逆湯主之

弱衰弱也復反也嘔則氣逆上小便當不利而復利者下焦虛有寒不能以制下也夫上不納而下不固陽氣衰微可知也其人見厥者難治然身有微熱復有其可生之道故與四逆湯溫裏散寒以

復其陽也此以熱厥俱在故隸諸厥陰病也

○乾嘔吐涎沫頭痛者吳茱萸湯主之

乾嘔吐涎沫者胃寒氣逆也逆故頭痛也此有乾嘔吐涎沫之裏證又有頭痛之表候故隸諸厥陰病也

吳茱萸湯方

吳茱萸 一升 人參 三兩 大棗 十二枚 生薑 六兩

右四味以水七升煮取二升去滓溫服七合日三服

○嘔而發熱者小柴胡湯主之

此太陽篇之裁文因似重出然斯舉之有深意存

焉也。蓋仲景慮厥陰病之難曉，唯舉此短證以在。欲令人能曉其義而已矣。夫嘔者裏病也，發熱者表證也。此以表裏相半，故證之於厥陰病，所以明夫三陽三陰必非經脈順傳說也。此與論語於終篇具載堯舜湯武之事，又孟子於終篇歷叙堯舜湯文孔子相承之次，義同矣。亦是絕筆之微意也。夫仲景南陽人也，地之相去也異，朝世之相後也。千有六百年，然屢現予枕傍，親面命口授於夢寐之際，如斯而已。

小柴胡湯方

柴胡八兩 黃芩三兩 人參三兩 甘草三兩

生薑三兩 半夏半升 大棗十二枚

右七味以水一斗二升，煮取六升，去滓更煎取三升，溫服一升，日三服。

○傷寒大吐大下之極，虛復極，汗者其人外氣怫鬱，復與之水以發其汗，因得噦，所以然者，胃中寒冷，故也。

玉函及諸註汗下有出字者，下有以字。○傷寒宜以汗解之，而反大吐大下之，胃氣極虛，復極汗出者，以其人本不得汗，故表氣怫鬱而然，因復與之。

水以發其汗其法令病人多飲水重被覆之鬱極而熱起汗隨出也先是經吐下胃氣極虛復與之水以發其汗則陽從外洩而胃重其虛水從內搏而寒格因得噦也所以然者釋上文之辭陽明篇曰胃中虛冷不能食者飲水則噦此以寒熱俱在故隸諸厥陰病也

○傷寒噦而腹滿視其前後知何部不利利之即愈玉函視作問○傷寒吃逆而腹滿者或前或後當有不利之處各利其不利之處則逆氣自下也蓋前節之噦從胃中虛冷而來此節之噦從胃中實

熱而來也此有寒熱之疑似故隸諸厥陰病也


右辨厥陰病脉證并治凡五十六章

傷寒雜病論集解卷九 畢

卷九

二十八

傷寒雜病論集解



長
壽
寺
印

